

նորա երթալք: Վասն որոյ զխաներն փակեաց ի քաղաքիս, զի ի դուրս նստցին ի քաղաքէս: Եւ ընդ աւուրսն հազար արանց կամ երկուց եկին ի Հասանէն և մտին ի տունս Հայոց և Տաճկաց յՈսկիւտ[ար], իբր ասել առ վէզիրն թէ Ահա՛ հազիւ պրծաք ի նմանէ: Եւ վէզիրն մեղադրէր, և նոքա ասեն. Ո՛վ տէր, եթէ ոչ լեալ էաք ընդ նմա, զմեզ ի սուր անցուցանէր. յերկիւղէ եղաք առ նա: Եւ կալաւ զգլխաւորս նոցին և սպանանէր անդ: Եւ տեսեալ զօրացն՝ զիմամարտեցան ի մէջ բանակին և ձգեցին ի վէզիրէն արս քսան կամ Լ, և փախեան ի լերինս, զի չունէին երես և առ Հասանն: Եւ զայս տեսեալ վէզիրին՝ իսկոյն մարդ հասուցեալ յամենայն ճանապարհս լերանց՝ ըմբռնէին, բերէին, սպանանէին յամենայն աւուր բազում արանց ի մէջ բանակին: Եւ իբրև գարշէին ի գիշոց նոցին և յարենէ, մեծամեծ խորս և փոսս փորեալ բազում՝ անգր լնէին եւ ծածկէին: Զայս լուեալ Հասանին՝ փութանակի առաքէ զօրս յիւրոց, որ էր գլուխ օրդէզիր Իփշիրին, եկեալ մերձ յԻզնիմիտ, որ կային անդ Դ փաշայք, զորս վէզիրն առաքեալ էր մանսուպին իւրեանց երթալ. եւ Բ պատճառ զի զօրօք առաքեաց՝ եթէ մտանել կարիցեն ի վերայ Հասանին, փորձելով զզօրութիւն նորին: Վասն այսորիկ լամցեալ և Հասանին առաքեաց զլաճ Իփշիրին, զի զամենեսեան զփաշայս ընդ զօրօքն ի սուր անցուցանէր, մինչև ի փախելոցն բողոք բարձեալ աղաղակաւ անկան ի բանակ վէզիրին թէ Այս ինչ գործեցաւ: Եւ եղև կրկին վէրք մեծ վէզիրին և ցամաքեցաւ արիւն սրտին, և ետ ձայնել ի քաղաքս և ի բոլորն թէ Սէֆէր ունիմ. և խորհէր հնարէր՝ թէ զի՛նչ արասցէ: Եւ յետ սակաւ աւուրց այն լինելոյ, եկն յայսկոյս՝ մտանելով ի քաղաքս և առնէր աիւան և ի գործ իւր: Եւ Հասանն եւս եւ ամենայն փաշայք ընդ նմա